



Starfsmenn

Þorvarður Árnason hefur verið forstöðumaður Háskólasetursins frá því um mitt ár 2006. Hann er doktor í umhverfisfræði en lauk áður grunnnámi í líffræði og í kvikmyndagerð. Helstu áhugamál hans eru náttúruljósmyndun og kórsöngur, hann syngur annan tenór í Karlakórnum Jökli og með Stökum Jökum.

Andreas Zöhrer er landfræðingur að mennt og kemur frá Austurríki. Í námi sínu lagði hann áherslu á loftslagsfræði, landfræðileg upplýsingakerfi, fjarkönnun og náttúruvernd. Sérþekking hans í notkun landfræðilegra upplýsingakerfa mun meðal annars gegna lykilhlutverki í vinnu við gerð verndaráætlana.

Ingibjörg Eiríksdóttir er staðsett á Kirkjubæjarklaustri en hún er sameiginlegur starfsmaður Háskólasetursins og Kirkjubæjarstofu. Nú í haust lauk hún BA námi í ferðamálafræði frá Háskólanum á Hólum. Ingibjörg er frá Reykjavík en þekkir svæðið í kringum Klaustur vel því hún hefur ferðast mikið um hálendið þar um slóðir.

Sandra Björg Stefánsdóttir hóf störf á Háskólasetrinu um mitt síðasta sumar eftir að hafa lokið BA námi í ferðamálafræði frá Háskólanum á Hólum. Útivist og klettaklífur eru meðal helstu áhugamála Söndru og telur hún að þessi áhugi falli vel að störfum hennar í NEED verkefninu.

Sigrún Inga Sigurgeirsdóttir flutti aftur heim til Hafnar eftir að hún útskrifaðist með BS próf í ferðamálafræði frá Háskóla Íslands í vor. Mörg af hennar helstu áhugamálum tengjast náttúrunni, svo sem fuglar og gróður. Þar að auki spilar hún á trompet með Lúðrasveit Hornafjarðar.

Soffía Auður Birgisdóttir er bókmenntafræðingur að mennt. Hún hefur verið í tvískiptu starfi sem sérfræðingur hjá Háskólasetrinu og sem adjúntk í íslenskum bókmenntum við Hugvísindadeild H.Í. Á allra síðustu árum hefur Soffía Auður m.a. unnið að viðamikilli rannsókn á verkum Þórbergs Þórðarsonar. Hún hefur einnig um árabil starfað sem bókmennta- og leiklistargagnrýnandi hjá Morgunblaðinu.

Háskólasetrið á Hornafirði Nýheimum

s: 470-8040

http://www.hi.is/page/Haskolasetur_Hornafirdi



Háskólasetrið

Háskólasetrið á Hornafirði er rannsókn- og fræðasetur Háskóla Íslands á Suðausturlandi. Það var formlega stofnað 30. nóvember 2001. Meginhlutverk þess er að auka þekkingu um náttúruferðir, menningu og samfélag á Suðausturlandi, bæði með sjálfstæðum rannsóknum og með því að veita fræðimönnum og nemendum, erlendum jafnt sem innlendum, aðstöðu til rannsókn- og fræðastarfs.

Háskólasetrið heyrir undir stofnun Fræðasetra Háskóla Íslands. Markmið stofnunarinnar er að skapa aðstöðu til rannsókna á landsbyggðinni, auka möguleika almennings til menntunar og styrkja tengsl Háskóla Íslands við atvinnu- og þjóðlíf.

Starfssvæði Setursins nær yfir allt suðausturland en megináherslan til þessa hefur þó verið á rannsóknir í Austur-Skaftafellssýslu. Starfssvæðið skarast annars vegar við Fræðasetrið á Egilsstöðum og hins vegar við Suðurlandssetur Stofnunar Fræðasetra.

Meginviðfangsefni Háskólasetursins hafa frá upphafi verið rannsóknir á sviði umhverfismála og náttúruverndar, einkum í tengslum við ferðaþjónustu og starfsemi á friðlýstum svæðum. Við setrið eru einnig stundaðir rannsóknir um jöklafræði og loftlagsbreytingar, um bókmenntir og listir og í þjóðfræði.



Helstu verkefni Háskólasetursins:

NEED

NEED er skammstöfun fyrir verkefnið Northern Environmental Education Development project sem á íslensku mætti þýða sem Uppbygging náttúruskóla og umhverfismenntar á norðurslóðum. NEED er fjölþjóðlegt samstarfsverkefni Íslendinga, Finna, Norðmanna og Íra. Norðurslóðaáætlun Evrópusambandsins (Northern Periphery Programme) er aðalstyrktaraðili þess. Það er þriggja ára verkefni sem hófst nú í ár.

Í NEED- verkefninu er lögð áhersla bæði á þróun umhverfismenntar og á uppbyggingu fræðandi ferðaþjónustu á friðlýstum svæðum. Einnig er ætlunin að aðstoða heimamenn við að auka þekkingu sína á umhverfismálum og efla færni þeirra til að sinna störfum sem byggja á tilvist friðlýstra svæða. Meginmarkmið NEED- verkefnisins er að vernda náttúru og menningararf samhliða því að skapa ný, sjálfbær starfstækifæri í dreifðum byggðum þar sem atvinnuþróun hefur víða átt erfitt uppdráttar. Verkefnið mun einnig auka félags- og mannauð með því að tengja saman fólk í þéttbýli og dreifbýli, í gegnum vinnu að sameiginlegum viðfangsefnum í mennta- og ferðamálum.

Vatnajökulsþjóðgarður – Áhrif á samfélag og umhverfi

Verkefnið snýst annars vegar um að framkvæma langtíma rannsóknir á áhrifum Vatnajökulsþjóðgarðs á grannbyggðir hans, einkum varðandi samfélag, efnahag, umhverfi og lífsgæði íbúa. Hins vegar er ætlunin að byggja upp miðlunar- og samráðsvettvang um þessar rannsóknir í þeim tilgangi að styðja við sjálfbæra þróun og nýsköpun á nærsvæðum þjóðgarðsins. Aðalstyrktaraðili verkefnisins er Vaxtarsamningur Austurlands.

Ráðgjöf við gerð verndaráætlana fyrir suður- og vestursvæði Vatnajökulsþjóðgarðs

Verkefnin eru unnin fyrir svæðisráð í suður- og vesturhluta Vatnajökulsþjóðgarðs. Þau felast í söfnun og greiningu upplýsinga um náttúrur, landnotkun og menningarverðmæti innan þessara svæða og kortlagningu þeirra í sameiginlegan gagnagrunn. Einnig er unnið að fræðilegri úttekt á gerð áætlana um verndun og nýtingu friðlýstra svæða, ásamt greiningu á alþjóðlegum stöðlum og viðmiðum.

Út frá þessum gögnum verður hægt að meta verndar- og nýtingargildi einstakra hluta svæðisins á samræmdan hátt, bera þau saman og setja fram tillögur um verndarstig. Enn fremur verður leitað leiða til að bæta miðlun upplýsinga og að þróun samráðsferils við landeigendur og aðra heimamenn.



Þar að auki má nefna eftirfarandi verkefni:

Íslenskt landslag – Flokkun og verðmætamat

Ráðgjöf við mótun umhverfisstefnu fyrir Ríki Vatnajökuls

Tengsl loftslags- og jöklabreytinga suðaustan í Vatnajökli

Ráðgjöf við mat á umhverfisáhrifum áætlana vegna nýs hringvegjar

Munnleg hefð í Austur- Skaftafellssýslu (smáiðjan)

Skáldævisagan – Höfundarverk Þórbergs Þórðarsonar

Ráðgjöf við þróun menningartengdrar ferðaþjónustu

NEST - Þróun sjálfbærrar ferðaþjónustu á norðurslóðum (2005-7)